

TE MAU PARAU API NO ROTO MAI I TE TUHAA TORU

RURURAA I MOOREA

Ua tupu te tuhā matamua o te rururaa a te mau ôrometua pupu o te haapiiraa tāpati i TEAVARO i Moorea i te 7 ne Eperēra 1989. Te tumu parau i ferurihi a to te rururaa o **Te rautīraa ia i te parau a te Atua e te iho tumu Māohi.**

A taa noa atu ai te tere-maitai-raa te mau tāuà-parau-raa e te mau horoâraa manaò, teie te tahī o te mau pehepehe i faaineinehia mai e te mau mataèinna tātai tahī, nā reira hoi te tahī tārava.

TĀRAVA PAPETOAI

E te nūnaa Māohi e
A rave i to iho tumu e
Teie to reo, to fenua
Faaite i to iho tumu e

E te rautī e
A tià, faaitoitō e
A tià faaitoitō e
la ora to òe nūnaa e

PEHEPEHE NO TE MOANA

Ua àti te ao nei i te orihia e au
Aore rā te hoê vâhi i ànaànataehia e au
Ua tere mai au i Patitifa nei
Moana no te hau, moana no te tiàmā, moana no te here
Ua tārairai au i to ù nei tino i te hihi o te rā i te mau mahana atoà
E ua tae roa mai au i Oteania nei.

I te hoê mahana
Ua nânâ aè ra vau i àpatoà
I te âtea ê ra
Ua ite mai au ia `ò e Aimeho Nui i te poipoi roa
E to òe ra mau tara mouà
Ua puta roa ia i roto i te rai
Tupu aè ra te manaò e haere e fârerei ia òe.

Ua hee au
Umi te ûmi, maire te maire
E ua fâtata mai ra vau ia òe ra
Mea uti to òe na mau peho
E mea teatea to òe na tahatai
Auë to òe ûnaùna e Aimeho Nui e

Manaò aè ra vau ia òe
E pûpû ai i te mau faufaa i hunahia i roto i to ù neai hohonuraa
Ia òe ra vau e meho ai.

Puhi mai ra te hupe haumârû no to òe ra mau peho
Hoî iho ra vau i te hauà o te mau tiare
E ia fâtata mai ra vau i to òe ra tahatai
Ua âua-haaâti-hia òe e te aau
Aita aè ra ò i tuu ia ù ia fârerei ia òe i roto i to ù pûairaa
Ua vâvâhi roa òe ia ù, huâhia vau
E ia hoi au i te one o to òe ra tahatai
Ua tûrai mai òe ia ù

Ua tiâturi hoi au e faahei mai òe ia ù te hei tiare
Ua faahei mai râ òe viivii
Ua tâparu vau ia òe i te mau mahana atoà ia noho vau ia òe ra
Ua tûrai mai râ òe ia ù

E Aimeho Nui e
Ua òre te manaò no te pûpû atu i te faufaa ia òe
Ua fâ mai ra te manaò no te iritiraa i teie nei faufaa
Te poto nei te taime e ahoaho ai òe i te maitai o te moana
E poto te taime e tipee ai òe i to òe maitai
E poto te taime e nee ai òe no to òe maitai

Pârahi e a faaitoitō e Aimeho Nui e

Pehepehe fatuhia e to AFAREAITU

TE MITI



Mai ia ù i fētii i te fenua
E fētii atoà vau i te miti
Mai te fenua no reira to ù ora
Na te miti atoà e faaàmu nei ia ù
Eita vau e ora aita e fenua
Eita vau e ora aita e miti
Mai te aho ora e haaàti ia ù nei
Oia atoà te miti i te haaàtiraa i taù fenua
E èà te miti no te parau maitaì e tae mai
E mea nā reira atoà mai rā te parau fifi
I te tau o te mau tupuna ra
E tāpaò tāmāraa te miti i te viivii
I teie rā tau, te haaviivihia nei ia
E Fānau ora hoì te miti
E haaputu taèro pohe i teie nei
Te vai ra ãnei te mahana
Eita ta ù e noaa faahou i te miti
Ia tae i te reira taime ra
Eere ia māua o te miti e fētii faahou : e
faataa rā.
Ia taata hoì māua ra
O to ù iho ia hopeà
E te Rahu Nui e
A haapii i to ù nünaa i te aroha i te miti.

Pehepehe fatuhia e to AFAREAITU

TE MAU PARAU API NO ROTO MAI I TE TUHAA TORU

HIMENE

Ua riro hoì òe no ù nei
Ei puna ora no ù e

} tāpiti

Te tumu meià
To ù ora, to ù ora, o òe
To ù ora, to ù ora
Teie nei mahana

} tāpiti

O meià roa

To ù tumu, to ù tumu
Taraèhara e
Faaora ia ù (i) roto i to ù àti
E ipo ia ù (e) te Atua

} tāpiti

A faaroo mai na ti taù piri nei
E mouà to na mouà teitei
Faarauhia e ta ârā âivi
Tiraha aè ra te faa heeuri hotu rahi
Te tārava tahe ra te pape i te faa
Tae roa i te muriavai
I reira te pape e färerei âpā ai i te tai
Ua faaupoo te miti i te ata i tai ra
Mutu iti nehenehe terā i pihai iho
Ua tai òotoòto te tōrea ra
Tei te òoutu i te marae
O vai rā ia fenua nehenehe
O Afareaitu ia taù âià here
O te piri teie no to ù âià

TE REO

Māòhi e, Māòhi e
Te moè nei òe, te marau atu ra òe
Māòhi e, Māòhi e
A tiré na i te ite-òre-raa ia òe
A tìa na, a ueue ia òe
A fāriu mai, a neva mai, e a hiò mai na
Māòhi e, Māòhi e
Ua turi ānei to òe tarià
I òre ai òe e faaroo faahou mai
A haere mai, a haere mai
A tātua ia òe i te here māòhi
A tātua ia òe i te fārii māòhi
A tātua ia òe i te aroha māòhi
A tātua ia òe i te iho māòhi
Faaea òe i te tāpii i ta vērā mā

A tāpii i ta òe iho nā muu roa
Te haere tià nei òe i hea
A hiò mai ia ù, o vau to òe reo teie e pii atu nei ia òe
Te reo o te tupuna ta na i faaòhipa
Ta ù e ite atu nei i teie taime e te morohi atu ra
E reo no te âià teie e pii atu nei
A hoì mai, a hoì mai
Ia tāmā faahou te âià ia òe
Ia riro òe ei ohî mā
Ei ohî ruperupe
Ei ohî faahinaarohia
Māòhi e, Māòhi e
Pehepehe fatuhia mai e to Haapiti